

marchoit apres eux suivi de tous les françois qui chanterent en latin le *veni creator* alternatiuement avec les sauuaiges on arriua en cet ordre au 1^r berceau sous lequel Monseig^r. s'estant arresté, vn capitaine des onontagués, et vn ancien d'onneiout le haranguerent au nom de toutes les 5 nations Iroquoises. apres quoy on s'aduanca Jusques au 2^d. berceau sous lequel sa grandeur fut haranguée po⁹ la 3^e fois par nostre feruent [dogique] catechiste nommé paul qui estant acoutumé a parler souuent en public po⁹ Instruire ses freres fit icy son compliment avec vne force d'esprit, vne pieté, et vne eloquence incroyable dans vn sauuaige. Estant donc monté sur vn tronc d'arbre qui luy seruoit de Chaire il osta son chapeau fit le signe de la Croix et esleuant ses yeux avec sa voix au ciel il remercie Dieu de la grace qu'il leur faisoit de leur enuoyer le s^t. Euesque son lieutenant et demanda encore celle de profiter de sa visite. En suite s'adressant a sa grandeur, il la loua de son Zele et de sa Charité po⁹ les ames en luy rendent mille actions de graces po⁹ ses soins également estendus sur les françois et sur les pauvres sauuaiges. ce discours fini Monseigneur entra dans l'église ou le p^r cholenec en surplis luy presenta l'eau benite, et fit apres le salut du s^t sacrement, ou les françois et les sauuaiges chanterent encore a deux chœurs le pange lingua l'aué maris stella, et le domine saluum fac regem; apres quoy les sauuaiges seuls ho^{es} et femmes alternatiuement chanterent vn second motet du S^t sacrement.

Le salut achevé Monseigneur estant entré en nostre maison coe il vit que les sauuaiges le suiuoient il fit entrer les ho^{es}. leur donnent a tous sa main a baiser, et leur faisant plusieurs caresses, nommement a ceux qu'on luy disoient estre les plus feruens. Estant passé dans vne autre chambre il permit aux femmes d'y entrer po⁹ louer leur pieté a proportion du bien qu'on luy disoit de chascune